

Na osnovu člana 32. Statuta Općine Bugojno ("Službene novine Općine Bugojno", broj: 3/99, 4/02, 3/04 i 2/05), a u vezi sa predloženim Etičkim kodeksom kao osnovom političkog integriteta izabranih lokalnih i regionalnih predstavnika predloženim od strane Kongresa lokalnih i regionalnih vlasti Vijeća Evrope u 2000. godini, Općinsko vijeće Bugojno, na sjednici održanoj 22.12.2005. godine, utvrdilo je

ETIČKI KODEKS IZABRANIH ZVANIČNIKA OPĆINE BUGOJNO

I UVODNI DIO

Član 1.

1. Izabrani zvaničnici- vijećnici Općinskog vijeća i načelnik, kao neposredno izabrani predstavnici svih građana Općine Bugojno, uzajamno se obavezuju na poštovanje ovog Etičkog kodeksa (u daljem tekstu: Kodeks) sa ciljem opravdanja i jačanja javnog povjerenja kod građana, ličnog i političkog integriteta i autoriteta koji pripada Općinskom vijeću Bugojno (u daljem tekstu:OV) i njegovim izabranim zvaničnicima, te obavještenja javnosti o tome kakvo ponašanje može da očekuje od izabranih zvaničnika i pomoći u rješavanju njihovih eventualnih etičkih dilema.

2. Ovim Kodeksom izabrani zvaničnici u Općini Bugojno žele da promovišu etičke principe i standarde svog ponašanja, kojih će se pridržavati, kako bi u domenu svog mandata djelovali u najboljem interesu svih građana u općini.

II PODRUČJE PRIMJENE

Član 2.

1. Kodeks se odnosi na izabrane zvaničnike Općine Bugojno kao izabrane zastupnike građana na neposrednim i tajnim izborima.

2. Principi ponašanja ustanovljeni ovim Kodeksom će se primjenjivati i u izbornoj kampanji.

III PRINCIPI PONAŠANJA

Član 3.

Usvajanjem ovog Kodeksa, izabrani zvaničnici preuzimaju obavezu da će se, u cilju obavljanja svojih dužnosti u Općini Bugojno i prema javnosti u cjelini, pridržavati principa prioriteta zakona i općeg interesa, integriteta, nesebičnosti, zabrane mita i korupcije, otvorenosti, poštenja i odgovornosti, izbjegavanja sukoba interesa, pravilnog upravljanja resursima, obaveze profesionalnog usavršavanja, izbjegavanje kumulacije pozicija, uzajamnog poštovanja i uvažavanja.

3.1. PRIORITET ZAKONA I OPĆEG INTERESA

1. U svom cjelokupnom djelovanju izabrani zvaničnici će poštovati prioritet zakona i općeg interesa, te će svoju aktivnost usmjeriti ka ostvarivanju javnog interesa i zastupati interese građana.
2. Izabrani zvaničnici će u svom djelovanju kontinuirano imati na umu da su oni izabrani predstavnici svih građana općine Bugojno, a ne jednog dijela - partije.
3. Odluke i akcije podešavati isključivo u okviru propisa i po procedurama koje su predviđene određenim propisima.
4. Nijednu svoju odluku neće donijeti niti će glasati, a ni prećutati da javno iznesu svoj stav ukoliko im je poznato da određeni akt koji treba da se donese nije u skladu sa propisima ili da nije poštovana procedura njegovog usvajanja.

3.2. INTEGRITET

U svom djelovanju izabrani zvaničnici će, prema svojim znanjima i sposobnostima, samostalno donositi svoje odluke za koje su odgovorni, imajući u vidu najbolji interes svih građana i neće preuzimati financijske ili druge obaveze prema pojedincima i organizacijama koje bi za uzvrat tražile da vrše utjecaj na njih u obavljanju njihovih javnih funkcija.

3.3. NESEBIČNOST

Poštujući pravilo da mandat pripada izabranom predstavniku a ne političkoj stranci sa čije liste je izabran, izabrani zvaničnici će postupati u skladu sa općim interesom koji isključuje rad za financijsku dobit ili bilo koju drugu direktnu ili indirektnu korist za sebe ili lica iz svog privatnog okruženja.

3.4. ZABRANA MITA I KORUPCIJE

Izabrani zvaničnici ni u kom slučaju neće u obavljanju svojih funkcija primati ili davati neku naknadu, obećavati nagradu ili kakvu drugu korist ili se ponašati na bilo koji drugi način koji se može okarakterisati kao aktivno ili pasivno podmićivanje po važećim zakonima, a u vezi sa podržavanjem ili nepodržavanjem određenog akta, a naročito ako su ti stavovi suprotni Ustavu, Zakonima, Statutu Općine i drugim propisima.

3.5. OTVORENOST I ODNOSI SA MEDIJIMA

Izabrani zvaničnici će u svom djelovanju i u vezi sa odlukama koje donose uvijek biti otvoreni, blago-vremeno obavještavati javnost putem sredstava javnog informisanja i nijednom svojom aktivnošću neće izbjegavati da jasno i javno saopće svoje stavove i razloge za sopstvene odluke i ponašanja.

3.6. POŠTENJE I ODGOVORNOST

1. Izabrani zvaničnici će svoje dužnosti izvršavati pošteno u najširem smislu riječi, za svoje odluke i aktivnosti su odgovorni sudu javnosti i biće uvijek spremni da se podvrgnu bilo kojoj vrsti kontrole koja odgovara njihovom položaju.
2. Osjećajući sopstvenu odgovornost, izabrani zvaničnici neće svoju poziciju koristiti za davanje prijedloga akata ili insistirati na donošenju akata za koji znaju, ili je očigledno, da je suprotan propisima.

3.7. IZBJEGAVANJE SUKOBIA INTERESA

1. Izabrani zvaničnici će se u svakom slučaju pridržavati odredaba Zakona o sukobu interesa i drugih zakona koji uređuju nespojivost funkcija izabranog predstavnika sa funkcijom ili položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, izabrani zvaničnik će u najkraćem roku prijaviti takav slučaj i odstupiti sa pozicije.
2. Izabrani zvaničnik će u svakom slučaju tokom rasprave prijaviti slučaj sukoba interesa, ako se razmatra određeni akt koji treba da bude usvojen i po kome bi on, ili njegovi srodnici i prijatelji, ili pravni subjekt u kome ima finansijski ili drugi interes, trebalo da ostvari kakvu korist ili privilegiju, i prilikom odlučivanja će se izuzeti od izjašnjavanja.
3. Izabrani zvaničnik će se uredno pridržavati zahtjeva za prijavu podataka ili davanje informacija o funkcijama koje zauzima, zanimanju i promjenama u njihovoj imovini.

3.8. UPRAVLJANJE RESURSIMA

1. Izabrani zvaničnik će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom općine isključivo u skladu sa propisima i općim interesom. Svojim ponašanjem neće dati povoda niti aktivno ili pasivno učestvovati u pripremanju ili podsticati donošenje nepravilnih odluka koje bi mogle donijeti lične koristi ili ostvarenja nečijeg privatnog interesa sa kojima su povezani finansijskim ili nekim drugim interesom.
2. Izabrani zvaničnik će se uzdržavati od svih akcija koje bi trebalo da rezultiraju izborom, imenovanjem ili postavljanjem lica na određene pozicije, a da se pri tome ne sprovedu propisi, ne obezbijedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja i sposobnosti.

3.9. OBAVEZA PROFESIONALNOG USAVRŠAVANJA

U cilju što uspješnijeg obavljanja sopstvenih dužnosti, izabrani zvaničnik će, kako samostalnim aktivnostima tako i prisustvujući seminari ma, savjetovanjima i drugim oblicima edukacije, obogaćivati i usavršavati svoja znanja i sposobnosti.

3.10. IZBJEGAVANJE KUMULACIJE POZICIJA

Izabrani zvaničnik će u potpunosti biti posvećen ispunjavanju dužnosti koje mu pripadaju kao neposredno izabranom predstavniku, a imenovanja na druge pozicije će prihvatiti samo u onoj mjeri koja neće umanjivati njegove radne i druge sposobnosti za izvršavanja osnovnih obaveza.

3.11. UZAJAMNO POŠTOVANJE I UVAŽAVANJE

1. U međusobnoj komunikaciji i uopšte u komuni-kaciji sa javnošću, izabrani zvaničnik će u svakom slučaju istupati sa uvažavanjem i poštovanju, njegovati kulturu dijaloga, razgovjetno saopštavati svoje misli i ideje, izbjegavajući korištenje izraza koji mogu vrijeđati ili omalovažavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.

2. Poštujući obaveze izabranog zvaničnika da su dužni prisustvovati sjednicama Općinskog vijeća i tijela čiji su članovi, a uvažavajući jedne druge, neće napuštati zasjedanje prije završetka a ni tokom trajanja, a da prije toga ne saopće javno ili Predsjedavajućem razlog povremenog ili potpunog napuštanja zasjedanja. Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, Predsjedavajućem će saopćiti te razloge, a on će OV-e, tijelo i forum obavijestiti o razlogu izostanka pozvanog izabra-nika.

3. Izabrani zvaničnici će nastojati da prisustvuju javnim manifestacijama ili javnim skupovima na koje su uredno i blagovremeno pozvani u svojstvu izabranog predstavnika.

IV IZJAVA

Član 4.

Izabrani zvaničnici daju posebnu izjavu:

"Obavezujem se da ću, tokom svoga mandata, poštovati, odnosno pridržavati se odredbi Etičkog kodeksa izabranih zvaničnika Općine Bugojno".

Izabrani zvaničnici potpisuju tekst izjave.

V PRAĆENJE PRIMJENE KODEKSA

Član 5.

1. Izabrani zvaničnici će se uzajamno podsjećati i pozivati na obaveznost poštovanja principa ponašanja utvrđenih ovim Kodeksom.

2. Predsjedavajući OV-a će sa najvećom pažnjom pratiti ostvarivanje principa utvrđenih ovim Kodeksom i ovlašćuje se da u svakom momentu upozori na obavezu ponašanja u skladu sa Kodeksom, kao i da poduzme druge mjere u skladu sa Poslovníkom OV -a.

3. Izabrani zvaničnici će svojim aktivnostima podsticati održavanje javnih rasprava u prostorijama

Općine kao oblika neposrednog učešća građana u lokalnoj samoupravi, a na kojima bi građani iznosili svoja viđenja, između ostalog, i o poštovanju ovog Etičkog kodeksa.

Član 6.

1. Izabrani zvaničnik biće spreman da u slučaju ustanovljenja povrede neke od odredbi ovog Kodek-sa, bude podvrgnut kažnjavanju, a po postupku utvrđenom ovim Kodeksom.

2. Svrha ovog kažnjavanja je javna osuda neprihvatljivog ponašanja suprotnog Kodeksu kao i moralni utjecaj na buduće ponašanje izabranog predstavnika.

3. Kazne za povredu neke od odredbi ovog Kodek-sa su:

- ukor,
- javni ukor i
- novčana kazna.

4. Uz kaznu ukora i kaznu javnog ukora sa objavljivanjem izvještaja i odluke može se, kao sporedna kazna, izreći i novčana kazna, u skladu sa ovim Kodeksom.

Član 7.

1. Ako se izrekne kazna ukora, kao sporedna kazna, može se izreći i novčana kazna u visini od 10% mjesečne naknade za period od dva mjeseca.

2. Ako se izrekne kazna javnog ukora sa objavljivanjem izvještaja i odluke, kao sporedna kazna može se izreći i novčana kazna u visini od 20% mjesečne naknade za period od četiri mjeseca.

3. Novčana kazna, kao glavna kazna, izriče se u visini od 40% od mjesečne naknade, za period od tri do šest mjeseci. Ako je izrečena novčana kazna kao glavna kazna, smatra se da je izrečena, kao sporedna, i kazna javnog ukora sa objavljivanjem izvještaja i odluke.

Član 8.

1. U cilju obezbjeđenja primjene ovog Kodeksa, OV formira posebnu komisiju za praćenje poštivanja Etičkog kodeksa (u daljem tekstu: komisija), na prijedlog Komisije za izbor i imenovanje.
2. Komisija prati primjenu Kodeksa, a naročito javno iznesene primjedbe i preporuke (u bilo kom obliku), postupa po pojedinačnim prijedlozima za utvrđivanje postojanja povrede Kodeksa, podnosi izvještaj OV-u sa preporukama i ima druga ovlaštenja utvrđena ovim Kodeksom.
3. Komisija se sastoji od pet članova, od kojih su dva iz reda vijećnika, a tri iz reda afirmisanih građana.
4. Komisija bira predsjednika iz reda svojih članova.
5. Na rad komisije shodno se primjenjuju odredbe Poslovnika OV-a.
6. Komisija je obavezna donijeti svoj poslovnik o radu, u što kraćem roku.

Član 9.

1. Svaki građanin je ovlašten da podnese prijavu povrede Kodeksa, a u prijavi će obavezno navesti za koje radnje smatra da su povreda Kodeksa i kojim dokazima to potvrđuje.
2. Komisija razmatra prijavu i ovlaštena je da provede postupak ispitivanja osnovanosti prijave, da provede potpuni dokazni postupak i nakon toga odluči da li postoji povreda neke od odredbi Kodeksa.
3. Ako komisija zaključi da nije bilo povrede neke od odredbi Kodeksa, o tome će obavijestiti podnosioca prijave, a OV -e će o takvim slučajevima obavještavati najmanje šestomjesečno.
4. Ako komisija zaključi da je određeni izabrani zvaničnik učinio povredu neke od odredbi Kodeksa, OV-u će podnijeti detaljan izvještaj sa preporukom o izricanju određene kazne/kazni.
5. OV-e odlučuje o vrsti i visini sankcije na osnovu preporuke komisije, izuzev ako ne ocjeni da nije bilo povrijede Kodeksa.

Član 10.

1. Kazna ukora se izvršava saopćenjem Predsjedavajućeg OV-a o izrečenoj kazni i dostavom primjerka odluke izabranom zvaničniku prema kome je kazna izrečena.
2. Kazna javnog ukora izvršava se objavljivanjem odluke OV-a o izricanju kazne u "Službenim novi-nama Općine Bugojno" i jednom od dnevnih listova.

3. Novčana kazna se izvršava dostavom odluke OV-a službi za financije koja će obezbjediti njeno izvršenje umanjem naknade izabranom zvaničniku, u skladu sa tom odlukom.

4. O izrečenim sankcijama za povredu Kodeksa vodi se evidencija u Stručnoj službi OV-a.

VI OBJAVLJIVANJE

Član 11.

1. Svojim aktivnostima izabrani zvaničnici će obezbjediti promociju ovog Kodeksa u javnosti i medijima.

2. Kodeks će se objaviti u "Službenim novinama Općine Bugojno".

Član 12.

Kodeks stupa na snagu osmog dana od dana objavljivanja u "Službenim novinama Općine Bugojno".

Broj: 01-02-1-1735/05
Bugojno, 22.12.2005. godine

**PREDSJEDAVAJUĆI
OPĆINSKOG VIJEĆA**

Ante Visković, s.r.